

Siap sedia stok bekalan ikan

15/1/2018 Sinar Harian m/s 41

JERAM – Lima persatuan nelayan dipilih sebagai pusat simpanan bekalan ikan seluruh negara bagi memenuhi permintaan pasaran menjelang sambutan Tahun Baharu Cina tidak lama lagi.

Pengerusi Lembaga Kemajuan Ikan Malaysia (LKIM), Datuk Seri Dr Irmohizam Ibrahim berkata, persatuan nelayan dipilih ialah Persatuan Nelayan Kebangsaan (Nekmat), Persatuan Nelayan Kedah dan Persatuan Nelayan Besut.

Menurutnya, dua lagi Persatuan Nelayan Sarawak melibatkan tiga kawasan pusat simpanan di Bilik Sejuk Kuching, Miri, Sibul dan di Sabah, melibatkan Persatuan Nelayan Kota Kinabalu.

“Inisiatif mewujudkan stok melalui persatuan nelayan ini diambil LKIM bagi menampung bekalan pasaran disebabkan jumlah pendarat-

an ikan tidak menentu.

“Jualan ikan harga patut juga akan diteruskan lagi di kawasan terpilih bahkan bekerjasama dengan Fama untuk adakan jualan ikan harga patut di Shah Alam sempena sambutan Tahun Baharu Cina,” katanya.

Beliau berkata demikian pada Program Jualan Ikan Segar Harga Patut di perkarangan rumah Pengerusi JKKP Kampung Bukit Kuching, Noh Buang.

Irmohizam yang juga Ahli Parlimen Kuala Selangor, memberi jaminan bekalan ikan terutama ikan kembung, cencaru dan pelaling mencukupi sepanjang musim perayaan nanti.

“LKIM dengan kerjasama Nekmat akan melimpahkan 40 tan stok simpanan ikan sejuk beku Q Fish di kawasan terpilih terutama pasar tani dan jualan ikan harga patut.



Irmohizam menunjukkan sebahagian ikan yang dilelong mendapat sambutan menggalakkan penduduk setempat di Kampung Bukit Kuching, pagi semalam.

“Insya-ALLAH, Nekmat sedang berusaha untuk tambah stok 20 tan ikan lagi supaya lambakan bekalan di pasar

tani sekali gus memberikan pilihan kepada pengguna.

“LKIM mengakui cuaca tidak menentu ketika ini

ditambah situasi laut bergelora dan jumlah ikan berkekurangan di perairan negara, jadi kami sedang mengkaji

punca kekurangan itu.

“Selain itu, LKIM melaksanakan larangan eksport ikan rakyat sehingga akhir Februari nanti dan perbincangan dengan KPDKK dibuat nanti bagi bendung isu harga melambung.

“Perbincangan ini penting bagi memastikan pihak tertentu tidak memanipulasi harga ikan menjelang musim perayaan,” katanya.

Sementara itu, penduduk, Musa Hasan, 67, mengakui harga ikan mambong yang dijual sempena program ini cukup berbaloi dan murah.

“Saya tak lepaskan peluang beli ikan mambong yang dijual RM6 sekilogram dan cukup berbaloi.

“Paling cepat habis ikan cencaru sebab tak sampai satu jam, orang ramai dah serbu, sotong dijual pun murah dalam RM28 sekilogram saiz pun besar,” katanya.